

Finger / vnd zeuch das Rohr heraus / vnd schmäck zu den Häfen / räuchts wol / so bleibt der Wein bey seiner Farb / vnd beständig / hat sie aber einen bösen geschmack / so ist es ein zeichen / daß der Wein nicht beständig ist.

Item / nimb des Weins mit einem Rohr oder Schöpffer mitten auß dem Faß in einen Becher / ist er beständig / so vergehet der schaum dar auff von stundt an / bleibt er aber / oder stehet der schaum lang darauff / so ist derselbig Wein nicht beständig.

Von etlichen Künsten / so man in dem Herbst zu den Weinen braucht.

Item / nimb ein Faß / darein du den Wein wilt giessen / vnd leg das auff den Läger / vnd fehr den Spundt vntersich / vnd setz ein Rachel mit Kolfewer dar vnter / vnd nimb für ein Pfening Benedischen Weihrauch / vnd leg ihn auff die Kolen / dz der Rauch in das Faß gehe / darnach stopff das Faß mit einem Tuch.

Item / man sol dz Faß legen auff den Beläger / vnd wenn man den Wein hinein giessen wil / so sol man vor ein Handtvoll Saltz braun brennen / vnd in dz Faß thun / vnd darnach sol man nehmen für drey Pfening gebranntes Weins / vnd solt in giessen auff dz gebrannt Saltz in das Faß / vnd solt ein Tüchlein netzen in gebranntem Wein / vnd solt es anzünden / vnd zu dem Spundt hinein lassen fallen / so entzündet sich der Wein in dem Faß / vnd wirt ein guter Rauch / vnd der Wein bleibet darinnen beständig.

Item / wenn der Wein vergoren hat in dem Herbst / so nimb ein Maß Maluasier / vnd thu das in ein kleines Kesselein / vnd setz in ein Feuer / vnd laß es sieden / vnd stosz zwey Lot Zimmetrinden in einem Mörsel / vnd thu es in den Kessel / vnd laß es sieden vntereinander / vnd geuß es also heiß in das Faß / vnd verspundt es gar eben / vnd laß es vier Wochen darinnen ligen / vnd darnach nimb ein halb pfundt Zuckers / vnd zwey Maß süßen Weins / vnd seuds vntereinander / vnd geuß es auch in das Faß / vnd stopff es gar eben zu / vnd laß es vier Wochen ligen.

Köstlichen Wein im Herbst zu machen.

Nimb ein Kübel voll Brunnenwasser / vnd ein Handt voll Saltz / vnd thu es vntereinander / vnd geuß es in das Faß / vnd das Faß sol zuvor geschwenckt seyn / mit dem Saltzwasser / vnd geuß wider heraus / vnd verspundt das Faß gar wol / bisz du das ander auch darein thust / Nimb ein halb pfundt Johannskraut abgestreiffet / vnd ein halb pfundt Zuckers / vnd ein halb pfundt Zimmetrinden / vnd seudt es wol vnter einander in ein